

आकाशवाणी

- 1.प्रधानमंत्री नरेन्द्र मोदी होंरें पारदर्शिता ते जोआबदेही गी बढावा देने लेई आर्टिफीशियल इंटेलीजेंस, ब्लाकचेन ते डेटा विशलेषण दे इस्तेमाल दी जरूरतें पर जोर पाया ऐ।
- 2.बजट दे बाद आहले इक वेबीनार गी संबोधित करदे होई प्रधानमंत्री मोदी होंरें आखेआ जे होर मते सुधारें ते बपार-कारोबार दे तौर-तरीकें गी सखल्ला बनाने लेई नीतिएं दी असरदार ांगै सिर अमल-आवरी अत लाजमी ऐ।
- 3.दिल्ली दी इक अदालतें आबकारी नीति आहले मामले च दिल्ली दे साबका मुखमंत्री अरविंद केजरीवाल ते साबका उपमुखमंत्री मनीश सिसोदिया गी बरी करी दिता ऐ। सीबीआई इस फैसले दे खलाफ हाईकोर्ट च अपील करग।
- 4.तमिलनाडु दे साबका मुखमंत्री ते ए.आई.ए.डी.एम.के. दे नेता ओ. पन्नीरसेलवम सत्ताधारी पार्टी डीएमके च शामिल होई गे न।
- 5.पाकिस्तान ने काबुल ते होरनें प्रांतें पर गज़ब-लिल-हक अभियान दे तैहत ब्हाई हमले करदे होई अफगानिस्तान दे खलाफ खुल्ली जंग दा ऐलान करी दिता ऐ।

<><><><><><>

PM Reform Expo

प्रधानमंत्री नरेन्द्र मोदी होंरें आखेआ ऐ जे सरकार आसेआ प्रक्रियाएं गी सौकखा बनाने, बपार दे तौर-तरीकें गी सखल्ला बनाने ते तकनीकें पर आधारत सुशासन दा विस्तार कीते जाने करी देश सुधारें दी बता पर तेज रफ्तार कन्नै अगगे बधा करदा ऐ। उ'नें आखेआ जे इस रफ्तार गी बनाई रखने लेई नीतिगत इरादें तगर गै सीमित नेई रेइयें उत्कृष्ट ांगै सिर अमल-आवरी बक्खी बी ध्यान देना लाजमी ऐ। अज्ज वीडियो कांफ्रेंसिंग दे राहें विकसित भारत लेई टेकनोलॉजी, सुधार ते वित्त विशे पर आयोजित बजट दे बाद आहले इक वेबिनार गी संबोधित करदे होई श्री मोदी होंरें आखेआ जे सुधारें दा मूल्यांकन छड़ा घोशणाएं दी विनाह् उप्पर नेई, सगुआं जमीनी स्तर पर उंदे असर दी विनाह् पर कीता जाना चाहिदा। उनें ए.आई, ब्लॉकचेन ते डेटा एनालिटिक्स दे व्यापक इस्तेमाल दे राहें पारदर्शिता, रफ्तार ते जवाबदेही बधाने पर जोर दिता। प्रधानमंत्री होंरें आखेआ जे पिछले इक दहाके च सरकार नै ांचागत विकास बक्खी चेता ध्यान दिता

Prez. Sortie

राष्ट्रपति द्रौपदी मुर्मू होंरें राजस्थान दे जैसलमेर वायुसेना स्अेशन पर स्वदेशी हल्के लड़ाकू, हेलीकाप्टर प्रचंड च डुआरी भरी। राष्ट्रपति द्रौपदी मुर्मू होंरें गुप कैप्टन नयन शांतिलाल बहुआ हंडे कन्नै हेलीकाप्टर च डुआरी भरी। 25एं मिंटे दी इस डुआरी दे दरान उनें गडिसर झील ते जैसलमेर किले दे उप्परा डुआरी भरी। मगरा लिखियै कीती गेदी इक संक्षिप्त टिप्पणी च राष्ट्रपति होंरें आखेआ जे देशे च बनाए गेदे हल्के लड़ाकू हेलीकाप्टर प्रचंड डुआरी भरना उंदे लेई इक रोमांचक अनुभव रेआ।

<><><><><><>

Vaishnav AI Trust

इलेक्ट्रानिक्स ते सूचना प्रौद्योगिकी मंत्री अश्विनी वैशणव होंरें आखेआ ऐ जे आर्टिफिशल इंटेलीजेंस दे इस्तेमाल च विश्वसनीयता बड़ी महत्वपूर्ण ऐ। अज्ज दपैहरी नमीं दिल्ली च इक मीडिया समूह आसेआ आयोजित राइजिंग भारत समिट गी संबोधित करदे होई श्री वैशणव होंरें ए.आई परिवर्तन गी गंभीरता कन्नै लैने दी जरूरतै पर जोर दिता। उनें आखेआ जे हर गें सक्रिय रूप कन्नै पुट्टी जानी लोडचदी ऐ। उनें आखेआ जे सरकार प्रतिभाएं दी उपलब्धता यकीनी बनाने पर चेचा ध्यान देआ करदी ऐ ते इस दिशा च राज्य सरकारें गी बी जत्न करने होडन।

<><><><><><>

BJP-Book

भारती जनता पार्टी नै आखेआ ऐ जे पॉल एम. मैकगार हुंदी कताब स्पाइंग इन साउथ एशिया ब्रिटेन, अमरीका ते भारत दा गुप्त शीत युद्ध च दावा कीता गेआ ऐ जे इंदिरा गांधी हुंदे कार्यकाल दे दरान करीब हर विभाग बदेशी खुफिया एजेंसी दे प्रभाव च हा। अज्ज दपैहरी नमीं दिल्ली च संवाददाताएं गी संबोधित करदे होई पार्टी दे प्रवक्ता सुधांशु त्रिवेदी होंरें आखेआ जे इस कताब च इब्बी आरोप लाया गेआ ऐ जे बदेशी खुफिया एजेंसी नै दो मौकें उप्पर भारती राजनीति च दखल दिता। दौनें मौकें पर एजेंसी नै कथित तौर पर सत्ताधारी कांग्रेस पार्टी गी पैसा भेजेआ ते इक मामले च ते एह रकम सिद्धे इंदिरा गांधी होंरें गी दिती गेई।

<><><><><><>

GDP Briefing

मुकख आर्थिक सलाहकार अनंत नागेश्वरन होरें आखेआ ऐ जे आलमी सतह उप्पर यककोतक्की आहले हालात दे बावजूद भारत दा आर्थिक प्रदर्शन मजबूत रेहा ऐ। नमीं दिल्ली च सकल घरेलू उत्पाद-जीडीपी दे हालिया आंकड़ें दे बारें च उंनं अज्ज आखेआ जे पिच्छले लगातार त्र'उं बरें च 7 फीसद शा मते दा असल जीडीपी बाद्दा, अर्थबवस्था दी व्यापक मजबूती गी दर्शादा ऐ। इस मौके उप्पर सांख्यिकी ते कार्यक्रमें दी अमल-आवरी सरबंधी मंत्रालय दे सचिव सौरभ गर्ग होरें गलाया जे चालू माली बरे दे दिसंबर च खत्म होई दी त्रीस तिमाही च जीडीपी दी विकास दर बरे 2022-23 दे नमें आधार बरे दे मताबक 7 इशारिया अट्ठ फीसद ऐ।

<><><><><><>

Iran FM Indirect Talks

ईरान दे बदेश मंत्री अब्बास अराघची होरें आखेआ ऐ जे परमाणु कार्यक्रम गी लेइयें अमरीका दे कन्नै ईरान दी अप्रतक्ख वार्ता हुनै धोड़ी दी सभनें शा व्यापक ते लम्मी गल्लबात चा इक ऐ। श्री अराघची होरें कल ईरान दे सरकारी टेलीविजन गी दित्ते गेदे इक इंटरव्यु च एह गल्ल आखी। उंनं कोई स्पष्ट जानकारी नेई दित्ती पर आखेआ जे ईरान दी तरफा जो होना चाहिदा, उसी स्पष्ट रूप कन्नै दस्सी दिता गेआ ऐ। अमरीका नै हुनै तगर वार्ता पर कोई टिप्पणी नेई कीती ऐ। ईरान ते अमरीका नै कल तेहरान दे परमाणु कार्यक्रम गी लेइयें केईं घंटे अप्रतक्ख गल्लबात कीती पर विजन कुसै समझौते दे गल्लबात खत्म होई गेई।

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश, कल 28 फरवरी गी दपैहरी साड्डे 12 बजे 'राष्ट्री विज्ञान दिवस' दे मौके पर 30एं मिंटे दी अवधि आहला इक खास कार्यक्रम प्रसारित करग। इस बशेश कार्यक्रम दा विशेसार होग "विज्ञान दे खेतर च महिलां विकसित भारत दी प्रेरणा"। इस बशेश कार्यक्रम च स्हाडियां परौहिनियां होडन-सी.एस.आई.आर-ट्रिपल आई.एम जम्मू दियां चीफ साइंटिस्ट डॉ. सुफला गुप्ता, जेहिडियां इस विशे पर अपने माहिराना बचार सांझे करडन।



Pak Airstrikes Kabul

पाकिस्तान दे रक्षा मंत्री नै अफगानिस्तान दे खलाफ खुल्ली जंग दा ऐलान कीता ऐ। इस घोशणा दे कन्नै पाकिस्तान नै अज्ज बड्डलै काबुल ते अफगानिस्तान दे दो होरनें प्रांतें च ब्हाई हमले कीते। तालिबान दे प्रवक्ता जबीउल्ला मुजाहिद होरें आखेआ जे पाकिस्तानी बलें काबुल, कंधार ते पकितया दे किश हिस्सें च ब्हाई हमले कीते। पाकिस्तान नै दावा कीता ऐ जे कल रातीं पाकिस्तान आसेआ अफगानिस्तान दे खलाफ गजब लिल हक अभियान दी शुरूआत दे बाद उन्ने तकीबन 133 अफगान तालिबानियें गी मारी मकाया ऐ। उत्थे गै तालिबान दे रक्षा मंत्रालय नै कल रातीं 19 पाकिस्तानी चौकियें ते 2 होरनें फौजी ठिकानें पर कब्जा कीते जाने ते कुल 55 पाकिस्तानी सैनिकें गी मारी मकाने दी गल्ल आखी ऐ।



LG-Goonj Fest.

उपराज्यपाल मनोज सिन्हा होरें अज्ज जम्मू युनिवर्सिटी च इक अनोखे युवा उत्सव-गूंज 2026 दा उद्घाटन कीता। 2 दिनें दा एह कार्यक्रम बक्ख-बक्ख खेतरें थमां नौजोआनें गी किट्ठे इक्कै मंच पर आहिनयै भविक्ख गी सोआरने लेई इक खास मंच उपलब्ध करोआ करदा ऐ। इस मौके पर किट्ठ गी संबोधित करदे होई एल.जी होरें आखेआ जे उत्सव नवाचार गी बढ़ावा देने दे कन्नोकन्नी नौजोआनें गी शिक्षित करने दा बी कम्म करोग। एल.जी सिन्हा होरें आखेआ जे सशक्त युवा, भविक्ख गी आकार दिंदे न ते उंदा मनना ऐ जे देसै दे तरक्की-बाददे आस्तै रचनात्मकता दे कन्नोकन्नी युवाएं दे नेतृत्व दी लोड़ हूंदी ऐ। उनें आखेआ जे असें सभनें गी लगातार विकास आस्तै संतुलित सोच ते नवाचार गी बढ़ावा देने पर ध्यान देना लोड़चदा ऐ। इस मौके पर बोलदे होई एल.जी होरें आखेआ



CM-Ranji Final

मुख्यमंत्री ओमर अब्दुल्ला हुंदा कल कर्नाटक दे हुबली जाने दा प्रोग्राम ऐ। मुख्यमंत्री कल जम्मू-कश्मीर ते कर्नाटक बश्कार रणजी ट्रॉफी दा फाइनल मैच दिक्खडन।

आकाशवाणी जम्मू दे संवाददाता दी रिपोर्ट मुजब मुखमंत्री हुं'दे कन्नै हुकमरान नेशनल कांफ्रेंस दे किश सीनियर लीडर बी जा'रदे न। मुखमंत्री हुं'दी मौजूदगी जम्मू-कश्मीर दी टीम दी हौसला अफजाई करग कीजे फाइनल च जम्मू-कश्मीर दी टीम, कर्नाटक गी हराइयै अपना पैहला पैहला रणजी ट्राफी दा खिताब जितने दे बड़े नेड़ेपुज्जी गेदी ऐ।

<><><><><><>

Search Op. Poonch

पुंछ जिले च कब्जा रेखा कन्नै लगदे देगवार सैक्टर च अज्ज इक संदिग्ध ड्रोन दा पता लगने मगरा सुरक्षाबलें इलाके च तपाशी अभियान शुरू कीता। ड्रोन दिक्खे जाने मगरा फौज दे दस्ते नै एहदे पर गोलीबारी शुरू करी दिती। फौज दी इस जवाबी कारवाई मगरा एह ड्रोन बन्ने पार वापस परतोई गेआ। शैंका ऐ जे एह ड्रोन पाकिस्तान आहली बक्खी दा भारती इलाके च दाखल होआ हा, पर फौज दी जवाबी कारवाई परैंत एह परतोई गेआ, जेहदे मगरा सुरक्षाबलें इलाके च तपाई अभियान रम्भ करी दिता। एह घटना हाल च कब्जा रेखा कश संदिग्ध ड्रोन गतिविधियें च होए दे बाददे कन्नै जुड़ी दी इक होर घटना दे तौर पर दिक्खी जा करदी ऐ। भारती फौज हाई अलर्ट पर ऐ ते ड्रोन रोधी सरिस्ते गी सक्रिय करा'रदी ऐ। एहदे अलावा घुसपैठ ते तस्करी दी कोशशें गी रोकने आस्तै लगातार तपाशी अभियान चलाए जा करदे न।

<><><><><><>

DGCA-Ticket Refund

नागरिक उड्डयन महानिदेशालय डी.जी.सी.ए नै ब्हाई डोआरिं सरबंधी टिकट वापसी नियमें च बदलाव कीता ऐ। यात्रु हून टिकटां बुक करने दे 48एं घेंटें दे अंदर-अंदर विजन कुसै बाददू शुल्क दे ब्हाई टिकटें गी किश बशेष हालात तैहत रद्द यां फही बदली सकदे न। इनें बदलावें तैहत एह विकल्प ओहिकियें घरेलू ब्हाई बुकिंगज पर लागू नेई रौहग, जिंदे जाने च 7एं थमां घट्ट दिन रेही गेदे न जां फही ओहिकिं अंतरराश्ट्री डोआरियें जिंदे जाने च 15एं थमां घट्ट दिन रेही गेदे न। उन्दे लेई बी एह विकल्प उपलब्ध नेई होग। निदेशालय दा एह बी आखना ऐ जेकर कोई यात्री बुकिंग दे 24एं घेंटें दे अंदर-अंदर नांs च त्रुटि दी सूचना एयरलाइन्स गी देई दिंदा ऐ ते ओहदे नांs गी ठीक करने लेई एयरलाइन्स गी कोई बाददू शुल्क लेई लैना चाहिदा।

<><><><><><>

Weather

जम्मू-कश्मीर च वीरवारें बी तापमान सामान्य थमां उप्पर दर्ज कीता गया। कश्मीर घाटी दे बी मते सारे हिस्सें च तापमान 8 थमां 10 डिग्री सेल्सियस दर्ज कीता गेआ जेड़ा के मौसम स्हाबें मता ऐ। आकाशवाणी जम्मू संवाददाता नै जानकारी दिती ऐ जे मौसम विभाग नै अज्जै आस्तै जम्मू-कश्मीर च मौसम आमतौरा पर खुश्क रौहने दी पेशनगोई कीती ऐ। 2 ते 3 मार्च गी किश-किश थाहरें पर बदल घनोने ते हल्की बरखा या बर्फबरी दी मेद जताई गेदी ऐ। एदे मगरा 7 मार्च तोड़ी मौसम आमतौरा पर खुश्क रौहग।

